

2015-imiit 2018 ilanngullugu kommuneqarfinni tamani ataatsimik ivigaasanik qallikkamik arsaattarfiliornissaq siunertaralugu Namminersorlutik Oqartussat Kommuneqarfillu isumaqatigiissusiornissaat isumageqqullugu kiisalu isumaqatigiissummi kommunit ivigaasanik qallikanik arsaattarfiit ingerlanneqarnerannut aserfallatsaaliorneqarnerannullu akisussaaffiup naammassinissaanut isumaqatigiissusiornissaq isumageqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Anders Olsen, Siumut)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerneqarnera

Naalakkersuisut siunnersuut qujassutigaa.

Aallaqqaasiullugu oqaatigineqassaaq arsaattarfinnik ivigaasanik qallikkanik sanaartornissaq tassaagaluarimat kommunit suliaasaat. Taamaammatt tamakkuninnga sanaartornissaq aserfallatsaaliuinissarlu pillugit aalajangernissaq, aningaasanillu immikkoortitsisoqassappat taamaaliornissaq kommunini ataasiakkaani nammineriittariaqarpoq.

Silami arsaattarfimmik nalinginnaasumik angissuseqartumik sanaartornissaq 6,5 mio. kr.-it missinginik akeqartussatut eqqoriarneqarpoq, arsaattarfillu pitsaasoq pissusissamisut atorneqarsimaguni, aserfallatsaaliorneqarsimaguni paarilluagaasimagunilu sivisunerpaamik ukiuni 8-12-ini pigineqarsinnaavoq. Taamaassappat sanaartorfiusussaq arsaattarfimmik ujaraaqqaanit sanaajusumik pitsaasumik aserfallatsaaliugaalluartumillu peqareersimassaaq.

Timersornermut sunngiffimmilu sammisassanut atorneqartussanik inuiaqatigiit akiligaannik sanaartornermi, aningaasaliissutit inunnut sapinngisamik amerlanerpaanut iluaqutaanissaat, aammalu ingerlatsinermut aserfallatsaaliuinernullu aningaasartuutit kommuninit akissaqartinneqarnissaat pingaartuupput.

Arsaattarfik ivigaasanik qalligaq apummit sermimillu qaammatini 6-7-ini qallersimaneqaruni atorluarneqarsinnaanaviannigilaq.

Taamaammatt Naalakkersuisut isumaqarput arsaattarfinnik qulisanik, atuarfiit, ilinniarfiit timersoqatigiiffiillu sapinngisamik amerlanerpaat ukioq kaajallallugu atorsinnaasaannik sanaartornissaq kommunit anguniarpasuk, tamanna pitsaanerpaassasoq.

Kommunit tunngavilersorluakkamik tunngaveqarlutik sulissappata, pissutsit soqutiginaatillit amerlanerusut paasiniaqqaarneqartariaqarput. Arsaattarfinnik ivigaasanik qallikkanik sanaartornissaq pillugu qanoq suleriaqqinnissap kommuninut oqaloqatigiissutigineqarnissaa Naalakkersuisut pingaartuusoraat.

Taamaamat siunnersuutip akuersissutigineqarnissaa, aningaasallu 600.000 kr.-it naalackersuisoqarfiup suliassaqarfiinut atugassiissutigineqartut iluanni immikkoortinneqarnissaat Naalackersuisut inassutigaat, tassa kommunini sisamaasuni tamani silami timersornermut atugassamik qulisamik ataatsimik sananissaq pillugu kommunit suleqatigalugit pilersaarusiornissamut atugassat.